

МЕСЯЦА МАРТА В 25-й ДЕНЬ.

**БЛАГОВЕЩЕНИЕ ПРЕСВЯТЫЯ ВЛАДЫЧИЦЫ НАШЕЯ
БОГОРОДИЦЫ И ПРИСНОДЕВЫ МАРИИ.**

**В Неделю на Малей вечерни,
стихиры праздника на 4. Глас 4.**

Подобен: Званный свыше:

Ущедрив тварь Зиждитель, милосердием же Своим прекланяемь, во утробу Девы Богоотроковицы вселится спешит. К Нейже великий прииде архангел, радуйся, провещавая, Богорадованная: ныне с Тобою Бог наш. Не ужасайся мене Царева архистратига: обрела бо еси благодать, юже погуби Ева прежде прамати Твоя и зачнеши и родиши Отцу Единосушнаго. **[Дважды.]**

Странно есть слово твое и воззрение, странны твои глаголы и возвещения, Мариа ко ангелу: да не прельстиши Мене, Дева бо есмь, брака не знающи: глаголеши, яко зачну Необыннаго: и како вместит утроба Моя, Егоже величества небесная вместити не могут? Авраамов кров да научит Тя ныне, Бога вместиный прообразующий издалеча Дево, Богоприятную Твою утробу.

В Назарет ныне град пришед, град Тя одушевлен Царя Христа Гавриил лобызает вопия Тебе: радуйся, благословенная Богорадованная, примешь во утробе Твоей Бога воплощаема, и Тобою человечество на древнее блаженство за благоутробие призывающа, благословен чрева Твоего Божественный Плод бессмертный подай миру очищение, и велию милость.

Слава, и ныне, глас 1:

В шестый месяц архистратиг послан бысть к Тебе Деве и Чистой, возвестити Тебе слово спасения, вкупе же и звати Тебе: радуйся обрадованная, Господь с Тобою. Родиши Сына Превечнаго из Отца, и спасет люди Своя от грех их.

На стиховне самогласен дне. Глас 7:

Виноград насадивый, и делатели призывай, близ есть Спас: приидите пощения подвижницы мзду восприимем, яко богат есть давец и милостив: мало делавше, примем душевную милость.

Ин самогласен. Глас 6:

В разбойническия помыслы впад Адам, прельстился умом, и уязвився душею, лежаше наг заступления: ни священник же прежде закона внят ему, ниже левит по законе воззрев нань: токмо Ты пришедый Боже, не от Самарии, но от Богородицы: Господи слава Тебе.

Мученичен: Мученицы Твои Господи, не отвергошася Тебе, ни отступиша от заповедей Твоих: тех молитвами помилуй нас.

Слава, и ныне, глас 4:

В шестый месяц послан бысть архангел к Деве Чистой, и радоватися Ей прирек, благовести из Нея Избавителю проити. Темже примыши целование, зачат

Тя Превечнаго Бога, несказанно благоволившаго вочеловечитися, во спасение душ наших.

Тропарь праздника , глас 4,

Днесь спасения нашего главизна, / и еже от века таинства явление: / Сын Божий Сын Девы бывает, / и Гавриил благодать благовествует, / темже и мы с ним Богородице возопиим: / Радуйся, Благодатная, / Господь с Тобою.

Ектенна малая, и отпуст.

**На Велицей Вечерни,
по обычном псалме, поем Блажен муж, первый антифон.**

На Господи возвах, стихиры на 10:

Триоди подобны 3,

И праздника 7:

Стихиры праздника, глас 6.

Подобен: Всю отложивше:

Совет превечный открывая Тебе Отроковице, Гавриил предста, Тебе лобзая и вещая: радуйся, земле ненасеянная: радуйся, купино неопалимая. Радуйся, глубино неудобозримая: радуйся, мосте к небесем преводяй, и лестнице высокая, юже Иаков виде: радуйся, Божественная стамно манны: радуйся, разрешение клатвы: радуйся, Адамово воззвание, с Тобою Господь. **[Трижды.]**

Являеши Мне яко человек, глаголет нетленная Отроковица ко архистратигу, и како вещаеши глаголы паче человека? Со Мною бо рекл еси Богу быти, и вселитися во утробу Мою. И како буду, глаголи Ми, вместилище пространное, и место священия, херувимы Превосходящаго? Да не прельстиши Мене лестию, не бо познах сласти, браку есмь непричастна: како убо Отроча рожду? **[Дважды.]**

Бог идеже хочет, побеждается естества чин, глаголет безплотный, и яже паче человека содеваются, моим веруй истинным глаголом, Всесвятая Пренепорочная. Она же возопи: буди Мне ныне по глаголу твоему, и рожду Безплотнаго, плоть от Мене заимствовавшего, яко да возведет человека, яко един силен, в первое достояние, срастворением. **[Дважды.]**

Слава, и ныне, глас тойже, самогласен:

[Иоанна монаха:] Послан бысть с небесе Гавриил архангел, благовестити Деве зачатие: и пришед в Назарет, помышляше в себе, чудеси удивляясь: о како в вышних непостижим Сый от Девы раждается! Имеяй престол небо, и подножие землю, во утробу вмещается Девичу! На Негоже шестокрилатии, и многоочитии зрети не могут, словом едином от Сея воплотитися благоизволи. Божие есть слово настоящее. Что убо стою, и не глаголю Деве: радуйся Благодатная, Господь с Тобою: радуйся, Чистая Дево, радуйся, Невесто Невестная: радуйся, Мати Живота, благословен Плод чрева Твоего.

Вход, прокимен дне, и чтения праздника 3.

Бытия чтение. [Глава 28.]

Изыде Иаков от студенца клятвеннаго, и иде в Харрань. И обрете место, и спа тамо. Зайде бо солнце: и взят от камня места того, и положи возглавие себе, и спа на месте оном, и сон виде: И се лестница утверждена на земли, еяже глава досязаше до небес, и ангели Божии восхождаху и низхождаху по ней. Господь же утверждашеся на ней, и рече: Аз Бог Авраамов отца твоего, и Бог Исааков, не

бойся: земля, идеже ты спиши на ней, тебе дам ю и семени твоему. И будет семя твое яко песок земный, и распространится на море, и Ливу, и север, и на востоки: и возблагодарятся о тебе вся колена земная, и о семени твоём. И се аз с тобою сохраняяй тя на всяком пути, аможе аще пойдёши: и возвращу тя в землю сию, яко не имам тебе оставить, дондеже сотворити Ми вся, елика глаголах тебе. И воста Иаков от сна своего, и рече: яко есть Господь на месте сем, аз же не ведех. И убося, и рече: яко страшно место сие, несть сие, но дом Божий и сия врата небесная.

Пророчества Иезекиилева чтение. [Главы 43 и 44.]

Также глаголет Господь: будет от дне осмаго и прочее, сотворят иереи на олтари всесожжения вашего, и прииму вы, глаголет Адонаи Господь. И обрати мя на путь врат святых внешних, зрящих на востоки, и сия бяху затворена. И рече Господь ко мне: врата сия затворена будут, и не отверзутся, и никтоже пройдет сквозе их, яко Господь Бог Израилев пройдет ими, и будут затворена. Яко Игумен сядет в них снести хлеб, по пути Еламских врат внидет, и по пути его изыдет. И введе мя по пути врат святых сущих к северу, прямо храму: и видех, и се исполнь славы храм Господень.

Притчей чтение. [Глава 9.]

Премудрость созда себе дом, и утверди столпов седмь. Закла своя жертвенная, и раствори в чаши своей вино, и угодова свою трапезу. Посла своя рабы, созывающы с высоким проповеданием на чашу глаголющы: Иже есть безумен, да уклонится ко мне. И требующим ума рече: Приидите, ядите мой хлеб, и пейте вино, еже растворих вам. Оставьте безумие, и живи будите, и взыщите разума, да поживете, и исправите разум в ведении. Наказуяй злыя, примет себе безчестие: обличаяй же нечестиваго, опорочит себе, обличения бо нечестивому раны ему. Не обличай злых, да не возненавидят тебе: обличай премудра, и возлюбит тя. Дажь премудрому вину, и премудрший будет: сказуй праведному, и приложит приимати. Начало премудрости, страх Господень, и совет святых, разум. Разумети бо закон, помысла есть благаго: сим бо образом многое поживеши время, и приложатся тебе лета живота.

И посем ектения: Рцем вси:

Таже, Сподоби Господи:

и Исполним вечернюю:

На литии стихиры праздника, самогласны 3, глас 1:

[Византиево:] В шестый месяц архистратиг послан бысть к Тебе Деве и Чистой, возвестити Тебе слово спасения, вкупе же и звати Тебе: радуйся обрадованная, Господь с Тобою. Родиши Сына Превечнаго из Отца, и спасет люди Своя от грех их.

[Анатолиево:] В месяц шестый послан бысть с небесе Гавриил архангел, во град Галилейский Назарет, принести Отроковице радость благовещения: и пришед к Ней, возопи глаголя: радуйся обрадованная, Господь с Тобою. Радуйся, вместилище невместимаго естества: Егоже бо небеса не вместиша, утроба Твоя

вместе, Благословенная. Радуйся, честное Адамово воззвание, и Евино избавление, и радость мира, и веселие рода нашего.

Послан бысть Архангел Гавриил с небесе от Бога к Деве нескверней, во град Галилейский Назарет, благовестити ей странного образа зачатие. Послан бысть раб безплотен ко одушевленному граду и двери мысленней возвестити Владычняго пришествия снिति. Послан бысть воин небесный ко Пресвятыя Славы Палате, проуготовати Зиждигелю жилище неотъемлемо. И пришед к Ней зываше: радуйся, престоле огнезрачный, четверозрачных преславнейший: радуйся, седалище Царя Небеснаго. Радуйся, горо несекомая, приятелище пречестное: в Тебе бо все исполнение вселися Божества телесно, благоволением Отца присносущнаго и содейством Всесвятаго Духа. Радуйся, обрадованная, Господь с Тобою.

Слава, и ныне, глас 2:

Благовествует Гавриил Благодатней днесь: радуйся, Невестная Мати, и Неискусобрачная. Не удивляйся странному моему зраку, ни ужасайся, архангел бо есмь. Змий прельсти Еву иногда: ныне же благовествую Тебе радость, и пребудеши нетленна, и родиши Господа, Пречистая.

Аще суббота или неделя:

Слава, глас 8-й. Иоанна монаха.

Да веселятся небеса и радуется земля: ибо Отцу Соприсносущный, Собезначальный и Сопрестольный, щедротство приемь и человеколюбную милость, Себе постави во истощание, благоволением и советом Отчим: и во утробу вселися Девичу, предпочищенную Духом. О, чудесе! Бог в человецех, Невместимый в ложеснах, Безлетный в лето: и еже преславне, яко и зачатие безсеменно, и истощание несказанно, и таинство елико. Бог бо истощавается, и воплощается, и зиждется, ангелу ко Чистой зачатие глаголавшу: Радуйся, Обрадованная, Господь с Тобою, имей велию милость.

И ныне, глас 2:

Благовествует Гавриил Благодатней днесь: Радуйся, Невестная Мати, и Неискусобрачная, не удивляйся странному моему зраку, не ужасайся, Архангел бо есмь. Змий прельсти Еву иногда: ныне же благовествую Тебе радость, и пребудеши нетленна, и родиши Господа, Пречистая.

На стиховне стихиры самогласны, глас 4:

В шестый месяц послан бысть архангел к Деве Чистой, и радоватися Ей прирек, благовести из Нея Избавителю проити. Темже приемши целование, зачат Тя Превечнаго Бога, несказанно благоволившаго вочеловечитися, во спасение душ наших.

Стих: Благовестите день от дне спасение Бога нашего.

Языка, егоже не ведяше, услыша Богородица, глаголаше бо к ней архангел благовещения глаголы: отонудуже верно приемши целование, зачат Тя

превечнаго Бога. Темже и мы радующеся вопием Ти: из Нея воплотивыйся непреложно, Боже, мир миру даруй, и душам нашим велию милость.

Стих: Воспойте Господеву песнь нову, воспойте Господеву вся земля.

Се воззвание ныне явися нам: паче слова Бог человеком соединяется, архангеловым гласом прелесть отгоняется: Дева бо приемлет радость, земная быша небо, мир разрешился первыя клятвы. Да радуется тварь, и гласы да воспоят: Творче и Избавителю наш, Господи слава Тебе.

Слава, И ныне: глас 4.

[Андрея Иеросалимита:] Днесь радость благовещения, девственное торжество, нижняя с вышними совокупаются, Адам обновляется, и Ева первыя печали свобождается: и сень нашего существа, обожением Приемшаго смешение, Церковь Божия бысть. О таинства! образ истощания неведомь, богатство благодати несказанно. Ангел служит чудеси: Девича утроба Сына приемлет: Дух Святый низпосылается: Отец свыше благоволит: и изменение общим творится советом. В немже и имже спасшеся, вкупе с Гавриилом к Деве возопиим: радуйся, Обрадованная, из Неяже спасение Христос Бог наш, еже по нам прием естество, к Себе возведе. Того моли спастися душам нашим.

Таже, Ныне отпускаеши. И по Отче наш:

На благословении хлебов, тропарь праздника трижды, глас 4:

Днесь спасения нашего главизна, / и еже от века таинства явление: / Сын Божий Сын Девы бывает, / и Гавриил благодать благовествует, / темже и мы с ним Богородице возопиим: / Радуйся, Благодатная, / Господь с Тобою.

И Буди Имя Господне: с пением, трижды. И чтение праздника.

На Утрени

На Бог Господь: тропарь праздника трижды. Глас 4.

Днесь спасения нашего главизна, / и еже от века таинства явление: / Сын Божий Сын Девы бывает, / и Гавриил благодать благовествует, / темже и мы с ним Богородице возопиим: / Радуйся, Благодатная, / Господь с Тобою.

И глаголем три кафисмы.

По 1-й кафисме, оба седальны в Триоди, без ектении. И чтение праздника.

По 2-й кафисме ектения, и седален праздника, глас 1-й.

Подобен: Гроб Твой:

Великий воевода невещественных Ангел, во град Назарет представ, Царя возвещает Тебе, Пречистая, веков и Господа, Радуйся, глаголя Тебе, благословенная Марие. Непостижимое и несказанное чудо, человеков обновление.

Слава, и ныне, тойже: и чтение праздника.

По 3-й кафисме седален праздника, глас 3.

Подобен: Красоте девства:

Днесь вся тварь радуется, яко еже радуйся, Тебе глаголет архангел, Благословенная, Честная и Пречистая Мати Христа Бога. Днесь омрачается змиино шатание: клятвы бо праотчи разрешается союз. Темже и непрестанно вопием Ти: радуйся, обрадованная.

Слава, и ныне, тойже.

По чтении же даются свечи братии.

По полиелеи седален, глас 4.

Подобен: Удивися Иосиф:

Гавриил с Небесе, еже радуйся, зовет Честней, яко зачат во чреве Превечнаго Бога, словом концы составльшаго. Темже Мариам отвещаваше: безмужна есмь и как рожду Сына: безсеменное рождение кто виде? И сказуя глаголаше ангел Богородице и Деве: найдет на Тя Дух Святыи и сила Вышняго осенит Тя.

Слава, и ныне, глас и подобен тойже:

Послан бысть Гавриил к Деве Марии, и возвести Ей неизглаголанную радость, яко безсеменно зачат и не истлевет. Родиши бо Сына, Превечнаго Бога, и спасет люди Своя от грех их: и свидетельствует Пославый мя вопити Тебе благословенная, еже радуйся: Дева родиши, и по рождестве паки пребудеши Дева.

И чтение праздника.

Степенна, 1-й антифон 4-го гласа, ихже стихи повторяюще поем:

От юности моя / мнози борют мя страсти, / но Сам мя заступи, / и спаси Спасе мой.

Ненавидящии Сиона, / посрамитесь от Господа, / яко трава бо огнем / будете изсохше.

Слава и ныне: Святым Духом всяка душа живится, и чистотою возвышается, светлеется Троическим единством священнотайне.

Прокимен, глас 4:

Прокимен: Благовестите день от дне спасение Бога нашего.

Стих: Воспойте Господеви песнь нову, воспойте Господеви, вся земля.

Всякое дыхание:

Евангелие Луки, зачало 4.

Во время оно: Воставши же мртвѣи во дни тѣмъ, иде въ горнаа со тцѣнїемъ, во градъ ѡдговъ: и вниде въ домъ захарїинъ и цѣловѣ елїсавѣтъ. **И** бысть ѡкѡ оуслыша елїсавѣтъ цѣлованїе мртвѣи, възграса младенецъ во чревтѣ еѣ: и исполниса дѣа стѣ елїсавѣтъ, и возопи гласомъ велиимъ, и рече: блгвѣна ты въ женахъ, и блгвѣнъ плодъ чрева твоегѡ: и ѡкѡдѡ мнѣ сїе, да прїидетъ мѣи гдѣа моегѡ ко мнѣ; се бо, ѡкѡ бысть гласъ цѣлованїа твоегѡ во оушїю моєю, възграса младенецъ радощами во чревтѣ моимъ: и блженна въровавшиа, ѡкѡ вѡдетъ совершенїе глгѡланнмъ еѣ ѡ гдѣа. **И** рече мртвѣи: величитъ дѣа моѡ гдѣа, и възрадовася дѣхъ мой ѡ бѣтѣ спсѣ моимъ: ѡкѡ призрѣ на смиренїе рабы своеѡ: се бо, ѡннѣ оублажатъ мѡ вси роди: ѡкѡ сотвори мнѣ величїе сильный, и стѡ има егѡ: **Превысть же мртвѣи съ нею ѡкѡ три мѣцы и возвратиса въ домъ свой.**

По 50-м псалме стихира праздника, глас 2. Самогласна:

Благовествует Гавриил Благодатней днесь: радуйся, Невестная Мати, и Неискусобрачная. Не удивляйся странному моему зраку, ни ужасайся, архангел бо есмь. Змий прельсти Еву иногда: ныне же благовествую Тебе радость, и пребудеши нетленна, и родиши Господа, Пречистая.

Канон праздника, глас 4: ирмос по дважды: тропари на 12. Катавасия праздника. А идеже трипеснец, и поем канон праздника, со ирмосом на 6: и трипеснец, на 8. Катавасия, ирмос Троицы, оба лика вкупе.

Канон Благовещения, творение кир Феофана, егоже краегранесие по алфавиту, до 8-й песни. Глас 4.

Песнь 1.

Ирмос: Отверзу уста моя, / и наполнятся Духа, / и слово отрыгну Царице Матери, / и явлюся светло торжествуя, и воспою радуясь Тоя чудеса.

Да поет Тебе, Владычице, движа свирель духовную, Давид праотец Твой: послушай Дщи радованнаго гласа от ангела, радость бо возвещает Тебе неизглаголанную.

Ангел возопи: Вопию Тебе, веселяся, приклони ухо Твое, и вонми ми, Божие возвещающу безсеменное зачатие, обрела бо еси благодать пред Богом, еже никогдаже обрете другая, Всечистая.

Богородица рече: Да разумею, ангеле, твоих глагол силу, како будет, еже рекл еси? Глаголи явственнейше. Како зачну Дева сущи Отроковица? Како же и Мати буду Зиждителя Моего?

Ангел возопи: Лестно мя вещати помышляеши, яко мню, и радуюся, зря Твое утверждение. Дерзай, Владычице, Богу бо хотящу, удобь скончаются и преславная.

Катавасиа: Отверзу уста моя, / и наполнятся Духа, / и слово отрыгну Царице Матери, / и явлюся светло торжествуя, и воспою радуюся Тоя чудеса.

Песнь 3.

Ирмос: Твоя песнословцы, Богородице, / живой и независтный источниче, / лик себе совокупльшия духовно утверди, / в Божественней Твоей славе, / венцев славы сподоби.

Богородица рече: Оскуде князь от Иуды, время наста прочее, в неже явится языков надежда, Христос. Ты же, како Сего рожду Дева сущи, скажи?

Ангел возопи: Ищещи от мене уведети Дево, образ зачатия Твоего, но той несказанен есть, Дух же Святой зиждительною силою осенив Тя совершит.

Богородица рече: Моя прамати приемши разум змиин, пищи Божественныя изгнана бысть, темже и Аз боюся целования страннаго твоего, стыдящися поползновения.

Ангел возопи: Божий предстатель послан есмь, Божественный поведати Тебе совет. Что мене боишися, Всенепорочная, паче Тебе боящагося? Что благоговееши мне, Владычице, Тебе честно благоговееющему?

Катавасиа: Твоя песнословцы, Богородице, / живой и независтный источниче, / лик себе совокупльшия духовно утверди, / в Божественней Твоей славе, / венцев славы сподоби.

Седален праздника, глас 8.

Подобен: Свирелей пастырских:

Слово Божие на землю ныне сниде, ангел предста, вопия Деве: радуйся, Благословенная, Яже печатью едина сохраншися, во утробе приемши Предвечнаго Слова и Господа, да от прелести спасет, яко Бог, род человеческий.

Слава, и ныне, глас тойже:

Подобен: Повеленное:

Послан бысть с небесе архистратиг Гавриил от Бога, скоро предста ко одушевленному граду, глаголя к Ней явственно: Зиждителя приимеши, Дево, во утробе, и родиши Сего непреложне с плотию. Темже послан есмь возвестити Тебе странное рождество Чистая, и стою зовя Тебе: радуйся, Невесто Невестная.

Песнь 4.

Ирмос: Седяй в славе, / на Престоле Божества, / на облаце легце, / прииде Иисус Пребожественый, / нетленною дланию и спасе зовущия: / слава, Христе, силе Твоей.

Богородица рече: Священную некую Деву раждающую, слышах пророка, древле Еммануила прорекша. Хощу же разумети, како Божества растворение, естество человеческое претерпит?

Ангел возопи: Явила есть купина, неопальна пребывши, приемши пламень, обрадованная Всепетая, на Тебе таинства преславное: по рождестве бо пребудеши Чистая Приснодева.

Богородица рече: Освещаемь сиянием Бога Вседержителя, истины проповедниче, глаголи Гаврииле истиннейшая: како нетленне бывши чистоте Моей, Слова рожду, с плотию Безплотнаго?

Ангел возопи: Со страхом Тебе, яко раб Госпоже предстою, с боязнию Отроковице, ныне смотри тыждуся Тебе. Яко бо дождь на руно снидет на Тя Слово Отчее, яко благоволи.

Катавасия: Седяй в славе, / на Престоле Божества, / на облаце легце, / прииде Иисус Пребожественый, / нетленною дланию и спасе зовущия: / слава, Христе, силе Твоей.

Песнь 5.

Ирмос: Ужасошася всяческая / о Божественной славе Твоей: / Ты бо, Неискусобрачная Дево, / имела еси во утробе над всеми Бога / и родила еси Безлетнаго Сына, / всем воспевающим Тя / мир подавающая.

Богородица рече: Разумети не могу твоих словес известия: чудеса бо быша множицею, Божественною силою чудодействуема, знамения и образы законнии, роди же дева неискусомужне никогдаже.

Ангел возопи: Дивит Всенепорочная, и странно бо чудо Твое, Едина бо Ты всех Царя приимеши во утробе воплощаема, и Тя прообразуют пророческая речения, гадания и законнии образы.

Богородица рече: Всеми Невместимый, и всеми Невидимый, како Сей может во чреве Девиче вселиться, еже Сам созда? Како же и зачну Бога Слова, собезначальна Отцу и Духу?

Ангел возопи: К Твоему праотцу Давиду обещався посадити от плода Твоего чрева, на престоле царства его. Иаковлю Тя доброту, едину избра в словесное селение.

Катавасия: Ужасошася всяческая / о Божественной славе Твоей: / Ты бо, Неискусобрачная Дево, / имела еси во утробе над всеми Бога / и родила еси Безлетнаго Сына, / всем воспевающим Тя / мир подавающая.

Песнь 6.

Ирмос: Возопи прообразуя погребение тридневное, / пророк Иона в ките Богу моляся: / от тли избави мя, / Иисусе, Царю сил.

Богородица рече: Глагол твоих, Гаврииле, глас радованен приемши, веселия Божественнаго исполнихся: радость бо поведаети и веселие возвещаеши безконечное.

Ангел возопи: Тебе дадеся радость, Богомати Божественная, Тебе, еже радуйся, вся тварь вопиет, Богоневесто: Ты бо едина Мати Сына Божия пронаречеся Чистая.

Богородица рече: Евы Мною ныне да упразднится осуждение, да воздастся Мною долг днесь, Мною заимствование древнее да дастся преисполнено.

Ангел возопи: Обещася Бог Аврааму праотцу, благословити в семене его языком, Чистая, Тобою же конец обещание приемлет днесь.

Катавасия: Возопи прообразуя погребение тридневное, / пророк Иона в ките Богу моляся: / от тли избави мя, / Иисусе, Царю сил.

Кондак праздника, глас 8.

Взбранной Воеводе победительная, яко избавльшася от злых, благодарственная восписуем Ти раби Твои, Богородице; но яко имущая державу непобедимую, от всяких нас бед свободи, да зовем Ти: радуйся, Невесто Невестная.

Икос: Ангел предстатель с небесе послан бысть рещи Богородице: радуйся, и со безплотным гласом воплощаема Тя зря, Господи, ужасашеся и стояше, зовый к Ней таковая: Радуйся, Еюже радость возсияет: радуйся, Еюже клятва исчезнет. Радуйся, падшаго Адама воззвание: радуйся, слез Евиных избавление. Радуйся, высоту неудобовосходимая человеческими помыслы: радуйся, глубино неудобозримая и ангельскими очима. Радуйся, яко еси Царево седалище: радуйся, яко носиши Носящаго вся. Радуйся, звездо, являющая Солнце: радуйся, утробо Божественнаго воплощения. Радуйся, Еюже обновляется тварь: радуйся, Еюже поклоняемся Творцу. Радуйся, Невесто Невестная.

И чтем Пролог.

Песнь 7.

Ирмос: Не послужиша твари богомудрии / паче Создавшаго, / но, огненное прещение мужески поправше, / радовахуся, поюще: / препетый отец Господь и Бог, благословен еси.

Богородица рече: Свет невещественный поведая, в вещественне телеси совокупляемь, за милосердие многое, светлое Благовещение, Божественная проповедания, ныне взываеши Ми: благословен, Всечистая, Плод Твоего чрева.

Ангел возопи: Радуйся, Владычице Дево, радуйся Пречистая, радуйся, приятелище Божие, радуйся свещнице Света, Адамово воззвание, Евы избавление, горо святая, преевственное священие и чертог безсмертия.

Богородица рече: Душу очисти, и тело освяти, Церковь сотвори Мя вместительну Бога, скинию Богоукрашену, одушевлен храм наитием Пресвятаго Духа, и Жизни Чистую Матерь.

Ангел возопи: Яко многосветлую свещу, и Богоделанен чертог, вижу Тя ныне яко злат кивот, закона Подателя приими, Богоневесто, благоизволившаго человеческое избавити Тобою тленное существо.

Катавасиа: Не послужиша твари богомудрии / паче Создавшаго, / но, огненное прещение мужески поправше, / радовахуся, поюще: / препетый отцев Господь и Бог, благословен еси.

Песнь 8.

Ирмос: Слыши Отроковице Дево Чистая, / да речет убо Гавриил, / совет Вышняго древний истинный: / буди к приятию готова Божию, / Тобою бо Невместимый с человеки поживе, / тем и радуяся вопию: / благословите вся дела Господня Господа.

Богородица рече: Ум всяк побеждается земных, отвеща Девица, ищущи, яже ми вещаеши, преславная: слышах твоя словеса, но боюся, ужасающися, да не лестию Мя, яко Еву, далече послещи от Бога, но обаче се вопию: благословите вся дела Господня Господа, и превозносите Его во веки.

Ангел возопи: Се Тебе недоуменное разрешится, глаголет к сим Гавриил, добре бо рекла еси, вещь неудобопостижна. Словесем Твоих устен повинующися прочее, не сумнися яко льсти, якоже вещи веруй. Аз бо радуяся вопию: благословите вся дела Господня Господа, и превозносите Его во веки.

Богородица рече: Закон сей от Бога есть человеком, Непорочная абие глаголет, от общия любве рождество происходит. Не вем супружника сласти всеконечно, како убо глаголеши, яко рожду? Боюся, еда лещь глаголеши. Но обаче се вопию: благословите вся дела Господня Господа, и превозносите Его во веки.

Ангел возопи: Глаголы, яже мне вещаеши, Чистая, ангел паки глаголет, обычая есть рождества человеков смертных. Истинно Бога Тебе обещаваю, паче слова же и смысла воплощаема, яко весть, из Тебе. Темже и радуяся вопию: благословите вся дела Господня Господа, и превозносите Его во веки.

Богородица рече: Являшимися Мне истины вещатель, рече Дева, радости бо общия пришел еси благовестник. Душу убо очистих с телом, и по глаголу твоему буди Мне, да вселится Бог в Мя, к Немуже вопию с тобою: благословите вся дела Господня Господа, и превозносите Его во веки.

Катавасиа: Слыши Отроковице Дево Чистая, / да речет убо Гавриил, / совет Вышняго древний истинный: / буди к приятию готова Божию, / Тобою

бо Невместимый с человеки поживе, / тем и радуясь вопию: / благословите
вся дела Господня Господа.

На 9-й песни паки вжигают свечи братия.

Честнейшую не поем, но поем припев праздника:

Благовестуй земле радость велию, хвалите небеса Божию славу.

Таже ирмос:

Песнь 9.

Ирмос: Яко одушевленному Божию кивоту, да никакоже коснется рука скверных. Устне же верных, Богородице, немолчно, глас ангела воспевающе, с радостью да вопиют: радуйся Благодатная, Господь с Тобою.

Благовестуй земле радость велию, хвалите небеса Божию славу.

Паче смысла заченши Бога, естества обычая утаися, Отроковице, Ты бо в рождестве матерскаго избежала еси тленнаго естества и превышши сущи. Темже достойно слышиши: радуйся Благодатная Господь с Тобою.

Благовестуй земле радость велию, хвалите небеса Божию славу.

Како точиши млеко, Дево Чистая? Не может изрещи язык земли. Странну бо естества показуеши вещь, законнаго рождества устав преходиши. Темже достойно слышиши: радуйся Благодатная, Господь с Тобою.

Благовестуй земле радость велию, хвалите небеса Божию славу.

Тайно во святых писаниих глаголася о Тебе, Мати Вышняго: лествицу бо древле Иаков Тя образующую виде, рече: степень Божия сия. Темже достойно слышиши: радуйся Благодатная, Господь с Тобою.

Благовестуй земле радость велию, хвалите небеса Божию славу.

Чудное священноявленному Моисею, купина и огонь показа чудо, ищай же конца в прехождении времен, во Отроковице Чистой рече, узрю. Ейже яко Богородице да речется: радуйся, Благодатная, Господь с Тобою.

Слава Тебе, Боже наш, слава Тебе

Даниил Тя гору нарече мысленную, Родительницу же Божию Исаия, видит же яко руно Гедеон, Давид же священство глаголет, дверь же Тя ин. Гавриил же Ти взывает: радуйся, Благодатная, Господь с Тобою.

Благовестуй земле радость велию, хвалите небеса Божию славу.

Катавасия: Яко одушевленному Божию кивоту, да никакоже коснется рука скверных. Устне же верных, Богородице, немолчно, глас ангела воспевающе, с радостью да вопиют: радуйся Благодатная, Господь с Тобою.

Светилен праздника дважды.

Подобен: Со ученики:

Ангельских сил архистратиг послан бысть от Бога Вседержителя к Чистой и Деве, благовестити странное и неизреченное чудо. Зане Бог, яко человек, из Нея

младодействуется без семени, назидаяй весь человеческий род: людие, благовестите обновление мира.

Слава, и ныне:

Подобен: Жены услышите:

Еже от века днесь познавается таинство Божие, Бог Слово, Сын Девы Марии, за милосердие бывает, и радость Благовещения Гавриил просвещавает. С нимже возопием Ей: радуйся, Мати Господня.

На хвалитех, Всякое дыхание: и поем стихиры, на 4: глас 1.

Подобен: Небесных чинов:

С небесных кругов слетев Гавриил в Назарет, прииде к Деве Марии, вопия Ей: радуйся, зачнеши Сына, Адама древнейшаго Творца веков и Избавителя вопиющих Тебе: радуйся, Чистая.

Соприсносущее Слово пребезначальнаго Отца, не разлучився горних, ныне предста дольним, ради крайняго благоутробия, милость прием, еже на ны поползновения и Адамову нищету восприем, вообразися в чуждее.

Гавриил Деве благовестие с небесе принес, вопияше: радуйся, зачнеши во чреве Твоем Тобою вместимага, невместимага же всеми: и рождающая явишися, от Отца прежде денницы Возсиявшаго.

Пресущественное Слово, плотию вселився в Тя, Отчим советом, Богородице Дево, назда род иже по нам, падший от древния клятвы. Тем еже радуйся Тебе вси, Мати Христова, со ангелом вопием верно.

Слава, и ныне, глас 2, самогласен:

[Феофаново:] Еже от века таинство открывается днесь, и Сын Божий, Сын Человечь бывает: да худшее восприем, подаст ми лучшее, солгася древле Адам, и бог возжелев быти не бысть: Человек бывает Бог, да бога Адама соделает. Да веселится тварь, да ликовствует естество, яко архангел Деве со страхом предстоит, и еже радуйся приносит, печали сопротивное: за милосердие милости вочеловечивыйся, Боже наш, слава Тебе.

Аще есть суббота или неделя, славословие великое, и ектении и отпуст.

Аще же день постен, поем на стиховне Триоди самогласен дне, дважды и мученичен.

Слава, и ныне, праздника, глас тойже:

Да веселятся небеса, и радуется земля: ибо Отцу соприсносущий, собезначальный и сопрестольный, щедростию прием и человеколюбную милость, Себе постави во истощание, благоволением и советом Отчим и во утробу вселися Девичу, предпочищенную Духом. О чуде! Бог в человецех, Невместимый в ложеснах, Безлетный в лето: и еже преславнее, яко и зачатие безсеменно, и

истощание несказанно, и таинство елико. Бог бо истощается, и воплощается, и
зиждется, ангелу к Чистой зачатие глаголавшу: радуйся Обрадованная, Господь с
Тобою, имеяй велию милость.

ВЕЧЕРНЮ

**На Господи возвах: поем 11 Стихиры:
Триоди самогласен дне - две (без мученична);
и подобны Триоди три;
и праздника три;
и Архангела три.**

Стихиры праздника, глас 4, самогласны:

В шестый месяц послан быть Архангел к Деве Чистой и радоватися Ей прирек, благовести из Нея Избавителю проити. Темже приемши целование, зачат Тя Превечнаго Бога, несказанно благоволившаго вочеловечитися, во спасение душ наших.

Языка, егоже не ведяше, услыша Богородица, глаголаше бо к Ней Архангел Благовещения глаголы: отонюдуже верно приимше целование, зачат Тя Превечнаго Бога. Темже и мы радующеся вопием Ти: Из Нея воплотивыйся непреложно Боже, мир мірови даруй, и душам нашим велию милость.

Се воззвание ныне явися нам: паче слова Бог человеком соединяется, Архангеловым гласом прелесть отгоняется: Дева бо приемлет радость, земная быша небо, мир разрешился первыя клятвы. Да радуется тварь, и гласы да воспоеет: Творче и Избавителю наш, Господи, слава Тебе.

Архангела стихиры, глас 1

Подобен: Всехвальнии мученицы:

Гавриил великий, ум боговиднейший, светозарный и спасительный, свет трисолнечный зрит, и поет с вышними чины Божественное и страшное пение: молит даровати душам нашим мир и велию милость.

Великое таинство, первее Ангелом неведомое, и прежде век соблюдаемое, единому уверися тебе Гаврииле: и сие Единей поведал еси Чистой, в Назарет пришед. С Неюже моли даровати душам нашим мир и велию милость.

К 11-му стиху:

Стих: Творяй Ангелы Своя духи, и слуги Своя пламень огненный.

Света сый исполнь присно и творя хотение, и скончавая повеления Вседержителя, начальниче Ангелов, Гаврииле всеизрядне, любовию тя чтущия спасай, присно прося даровати душам нашим мир и велию милость.

Слава, и ныне, глас 6-й. Самогласен.

Послан бысть с Небесе Гавриил Архангел, благовестити Деве зачатие: и пришед в Назарет, помышляше в себе, чудеси удивляяся: о како в вышних Непостижимь Сый от Девы раждается! Имеяй престол небо и подножие землю, во утробу вмещается Девичу: на Негоже шестокрилатии и многоочитии зрети не могут, словом единым от Сея воплотитися благоизволи, Божие есть Слово настоящее. что убо стою, и не глаголю Деве: Радуйся, Благодатная, Господь с Тобою: Радуйся, Чистая Дево, Радуйся Невесто Невестная, радуйся, Мати Живота, благословен Плод чрева Твоего.

